



En la «anticamera» dal parlament han lieu blers discurs cun schurnalists e lobbyists: La schurnalista rumantscha en discurs cun cusseglier naziunal Martin Candinas. Davant dretg il president dal cussegl naziunal, Hansjörg Walter.



En la chasa da medias ha mintga schurnalist acreditat era sia chascha da brev: Fitg blers stampats derivan dad organizaziuns da lobby che tschertgan la publicitad.

FOTOS A. BEELI

# Cun la polit-schurnalista en chasa federala

La redacziun sin visita a Berna

DA AUGUSTIN BEELI / ANR

■ Nus ans regurdain anc tuts: Il settember 2006 è l'Hotel dil Parc a Flem stà l'umbilg politic da la Svizra. Durant trais emnas era l'entir manaschi cun chombras, cumissions e servetschs parlamentars sa transferi en il lieu da cura giudim la Surselva. Entant èn gias onns passads dapi quest eveniment istoric. Dapi lura rapporta Claudia Cadruvi quatter giadas l'onn da mintga sessiun a Berna. L'emna passada avain nus visità ed accompagnà ella en chasa federala. «Nua ans inscuntrains?», è stada l'emprima dumonda suenter che nus avevan fixà il termin. «Davant l'entrada da la chasa da medias», ha proponì la schurnalista. Quest chasament sa chatta a la «Bundesgasse 8-12». I sa tracta d'in grond bajetg da tschintg plauns gist visavi la chasa federala. En l'intern èn ils plazs da lavur da 350 schurnalists. Strusch da crair: In battagliun da schurnalists è respunsabel che tut quai che succeda en chasa federala a Berna vegnia derasà uschè svelto sco pussaivel en mintga rusna da la Svizra. «Trais auzadas èn reservadas per las medias da radio e televisiun, duas per las gasettas», explitescha Claudia Cadruvi durant che nus giain en l'ascensur per ans laschar transportar al tschintgavel plaun.

## Quater giadas l'onn a Berna

En il surchombras da la chasa da medias, en in lung local vers sid cun fanestras pitschnas e palantschieu sura inclinà, èn piazzadas maisas da lavur cun l'infrastructura da telecomunicaziun. Quà partan dus represchentants da la pressa rumantscha lur biro cun correspondentes dad autras regiuns svizas. Per exempel cun il correspondent federal dal «Landbote», la gasetta da Winterthur. E gist visavi il plaz da Claudia Cadruvi scriva e redegia

in schurnalist da la Svizra franzosa, davos ella èn anc trais auters collegas, in da quels è Lucas Deplazes che rapporta dapi 15 onns da Berna. Sulettamain schurnalists acreditads pon ir en ed or en la chasa da medias ed han cunquai er access en chasa federala. I dat glied da medias che èn tut l'onn a Berna, autra va mo durant las sessiuns en la chapitala, pia quater giadas l'onn, uschia sco Claudia Cadruvi.

Igl è las diesch e mesa. Entant ha la schurnalista daditg preparà la tematica ch'ella vul tractar oz. «Jau ma prepar adina la saira avant, nus avain a disposiziun fitg bunas funtaunas, declera Claudia durant ch'ella mussa e declera quellas. Per il cussegl naziunal e per il cussegl dals chantuns datti in program che cuntregn tut quai ch'il parlament sto tractar durant la sessiun. Chavazzins sco «Per ina Posta ferma – iniziativa populara», «Lescha da prevenziun da la sanadad», «Iniziativa davart la medischina da chasa», «Tratga da chavals en zonas d'agricultura» u «Finanziaziun da l'infrastructura dallas viafiers svizas» mussan la multifariadad. A Berna vegni fatg politica e furnà directives, i va per convenziuns, leschas, ordinaziuns, interpellaziuns, petiziuns, iniziativas, moziuns. Il catalog da la sessiun d'atun 2012 cuntregn per omaduas chombras pli che 240 fatschentas. Las medias da pressa, radio e televisiun pon pia metter ils accents ed eleger blers tematicas. Tranter quellas datti obligatoricas, alura interessantas, fitg interessantas, mo er il cuntrari, fitg stantusas e lunguras. Mintgina è dentant tuttina impurtanta per il funcziunar da noss stadi.

## Lavurar sut squitsch

La saira avant aveva nossa schurnalista rumantscha studegià la documentaziun ed ella era sa decidida da far ina runda d'interrogaziun tar ils parlamentarists grischuns. Cun sia carta d'accreditaziun ha

ella access en tut las stanzas da la chasa federala – en bunamain tuttas. I valan numadamain reglas rigurasas. Ins po avrir portas, dapertut èn dentant salters vestgids cun unifurmas ed er il blau da la polizia federala è omnipreschent. La schurnalista lavura sut squitsch da temp. Entaifer in'ura e mesa sto ella rimnar las opiniuns dals cussegliers naziunals grischuns che han votà en la chombra gronda tar la lescha da sanadad. Vesair ils tschintg Grischuns n'è betg grev. Tschiffar els per ina intervista plitost. D'ina tribuna reservada als schurnalists observain nus in mument il manaschi da la chombra gronda. Claudia Cadruvi ma declera l'urden da seser cun las fracziuns. Ella fa gia blers onns il servetsch da correspondent da Berna e conuscha las relaziuns e las persunas. La tematica dad oz ha ella annunzià gia baud a la redacziun centrala da l'anr a Cuira. Uss è ella respunsabla che ses artigel vegnia transmess enfin las quatter. Auters schurnalists han almain quatter uras daplì temp per far lur retschertgas. Tar la lescha davart la prevenziun da la sanadad era la dumonda quella, sche la polizia possa incassar ina multa da 100 u da 200 francs sch'ella tschiffa glied che fima chonv en la publicitad. Durant l'interrogaziun che Claudia fa sa mussan gist era las differenzas d'opiniuns tranter dretg e sanester. Ils discurs cun ils parlamentarists èn in spivel da la politica federala.

## Prioritad a las tematicas «pitschnas»

Dadora las duas chombras pudess ins paregljar la situaziun cun in furmicler. Cussegliers, lobbyists, schurnalists e glied dals servetschs dal parlament sa mischaidan, i vegn discurrì en la sala da la pressa, nua ch'ins po prender gasettas da tut la Svizra en tuts quater linguatgs. Jau ma sentel in pau losch dad ir a spass en la «Wandelhalle» cun la schurnalista e d'entupar chavals e liunessas da la politica svizra. Christoph Blocher ha gist dà ad in schurnalist da radio ina posiziun en connex cun la mort dad Otto Stich. Intginas minutas avant aveva il president dal cussegl naziunal annunzià quella novitad. Igl è «pavel frestg» per grondas gasettas, radio e televisiun, dentant betg per medias marginalas sco La Quotidiana. Claudia Cadruvi conferma ch'ella elegia cun prioritad tematicas che hajan connex cun quai che giaja en la politica grischuna, cun il pitschen, cun minoritads e sa chapescha cun il rumantsch. Sco quai ch'jau hai senti durant la visita en chasa federala datti en quest regard blers dapli tematicas che quai ch'ins pudess supponer. La schurnalista ma renda attent ad insatge ch'ella vul accentuar en quest connex: La complexadad da nosas millis leschas e directives sforza da s'aprofundir en la giurisprudenza. Per ella saja questa sessiun d'atun dal rest la davosa per in onn. Claudia Cadruvi è s'inscritta a l'Universitad da Turitg per il studi da giurisprudenza.



Ina lunga maisa cun l'entira multifariadad da la pressa dal di svizra: Mintga di pon ins era leger en chasa federala la suletta gasetta rumantscha dal di.



Il «batch» è la legitimaziun per entrar: Claudia Cadruvi avra la porta da la chasa da medias.



Curta scuntrada rumantscha: Sco Claudia Cadruvi da l'anr è er il represchentant da Radio e Televisiun Rumantscha, Adrian Camartin, gist a la tschertga d'in parlamentari.